



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 795, Datë 29.04.2021

“Mbi autorizimin e përqendrimit të realizuar nëpërmjet përfitimit të kontrollit të shoqërisë Radio Klan SHA nga shoqëria TV Klan SHA”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Z. Eduard YPI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 29.04.2021, shqyrtoi çështjen me:

Objekti: Autorizimi i përqendrimit të realizuar nëpërmjet përfitimit të kontrollit të shoqërisë Radio Klan SHA nga shoqëria TV Klan SHA.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit”; Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfitimit të kontrollit të shoqërisë Radio Klan SHA nga shoqëria TV Klan SHA.

VËREN SE :

Transaksioni dhe procedura

Pranë Autoritetit të Konkurrencës, është depozituar njoftimi lidhur me përfitimin e kontrollit të shoqërisë Radio Klan SHA nga shoqëria TV Klan SHA.

Pala Blerëse: Shoqëria TV Klan SHA është një shoqëri aksionare, e themeluar sipas legjislacionit shqiptar, me objekt aktiviteti veprimtarinë në fushën e mediave televizive, prodhimin, transmetimin dhe ritransmetimin e programeve dhe informacioneve të çdo lloji, me anë të zërit, figurës, sinjaleve të koduara për publikun, nëpërmjet valëve elektromagnetike, satelitëve apo me çdo formë tjetër të transmetimit televiziv.

Pala Shitëse: Z. Pal Toma është person fizik, shtetas shqiptar, aksioner 100% i aksioneve të shoqërisë Radio Klan SHA.

Target: Radio Klan SHA është një shoqëri aksionare, e themeluar sipas legjislacionit shqiptar, me objekt aktiviteti veprimtarinë radiofonike, që përfshin prodhimin, transmetimin e programeve dhe

informacioneve të çdo lloji me anë të zërit, sinjaleve të koduara, të shkrimit, të destinuara këto për publikun.

Më datë 3 mars 2021, shoqëria TV Klan SHA dhe personi fizik Pal Toma kanë nënshkruar “Marrëveshje për Blerje Aksionesh”, me objekt blerjen e aksioneve të shoqërisë target, Radio Klan SHA.

Bazuar në këtë marrëveshje, shoqëria TV Klan SHA do të blejë të gjitha aksionet e zotëruara nga z. Pal Toma dhe pas transaksionit, TV Klan SHA do të jetë zotërues i 100% të kapitalit aksionar të shoqërisë target, Radio Klan SHA.

Me vendimin nr. 45, datë 18.03.2021, Bordi i Autoritetit të Mediave Audiovizive, ka miratuar ndryshimet e ndodhura në strukturën e pronësisë së shoqërisë “Radio Klan” SHA., licencuar për subjektin audio kombëtar “Radio Klan”.

Me anë të këtij transaksioni, shoqëria TV Klan SHA ka për qëllim diversifikimin e aktiviteteve dhe plotësimin e tyre në fushën mediatike.

Vlerësimi i konkurrencës

Transaksion i njoftuar plotëson kriteret e përcaktuara në nenin 10 dhe 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit u konsiderua tregu i shërbimeve mediatike audio dhe treg përkatës gjeografik u konsiderua territori i Republikës së Shqipërisë.

Transaksioni i njoftuar është përfitimi i kontrollit të shoqërisë Radio Klan SHA nga shoqëria TV Klan SHA.

Shoqëria TV Klan SHA kryen aktivitet ekonomik në tregun e shërbimeve mediatike audiovizive dhe shoqëria Radio Klan SHA kryen aktivitet në tregun e shërbimeve mediatike audio në Shqipëri.

Shoqëritë veprojnë në tregje të ndryshme të transmetimeve mediatike dhe përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet përfitimit të kontrollit të shoqërisë Radio Klan SHA nga shoqëria TV Klan SHA.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS